

մար պէտք է միացնենք մեր թոյլ և բաժան բաժան ուժերը մի և նոյն նպատակի համար:

Ռուսաստանի ազատագրական շարժումը զարթեցրել է ամեն դասակարգի և ուղղութեան մարդկանց, ամենքն աշխատում են կազմակերպուել, իրենց գաղափարները տարածել, միայն հայ հոգեւորականութիւնը պէտք է անշարժ մնայ: Յանուն քրիստոնէական կենդանարար կրօնի, յանուն մեր ազգային հինաւորաց եկեղեցու և ժողովրդի բարոյական վերածնութեան և քաղաքակրթութեան պէտք է կազմակերպուենք և՛ մենք: Բայց այդ մասին հետեւել անգամ:

Դ. Վ. Յովսէփեան

Մ Ա Յ Ր Ա Թ Ո Ր

Ապրիլի 4-ին Մայր տաճարում՝ պատարագից յետոյ հայրապետական մաղթանք կատարուեց Սրբազնագոյն Կաթողիկոսի ծննդեան 88-րդ տարեդարձի առթիւ: Պատարագից յետոյ ամբողջ միաբանութիւնը ներկայացաւ Ն. Սրբութեան և ստացաւ նորա հայրական օրհնութիւնը:

Տ. Մատթէոս վարդապետը Ս. Հայրապետի կոնդակով գնաց Նուխի՝ պարգելու դպրոցի մէջ ծագած խռովութիւնների պատճառը, և՛ եթէ հնարաւոր է, հաշտեցնել կռուող կողմերին՝ դպրոցի մէջ խաղաղութիւն հաստատելով: Բայց հ. Մատթէոսի ջանքերը ապարդիւն անցան և նա ստիպուած եղաւ Ն. Սրբութեան դիմել՝ փակելու ժամանակաւորապէս դպրոցը:

Տ. Արտակ վարդապետ Սմբատեան նշանակուած է Քիչնիկ Կոնսիստորիայի անդամ ժամանակաորապէս արձակուած տեղական երկու քահանայի փոխարէն: Վերջիններս Կոնսիստորիայի քարտուղար պ. Կ. Օհանջանեանի հետ ենթարկուում են պատասխանատուութեան, Սինոդի անդամ Տ. Յուսիկ վարդապետի կողմից, որ քննիչ էր նշանակուած, գրամական զեղծումների և յափշտակութիւնների մէջ մեղադրելով:

Մի քանի օրով Մայր Աթոռ էին եկել Հին Նախիջևանի յաջորդ Տ. Լևոն և Բագուի գործակալ Տ. Զաւէն վարդապետները. առաջինը իւր փոխանորդութեան վերաբերեալ գործերով, իսկ երկրորդը՝ Սրբալսյս միւռոն տանելու:

Մայր Աթոռ վերադարձան Տ. Տ. Եղիա, Յուսիկ և Գարեգին վարդապետները. Յուսիկ վարդապետը Վեհափառ Հայրապետի կոնդակով նպաստամատոյց Յանձնաժողովի խնդիրքով ուղարկուած էր Ռուսաստանի հայաբնակ քաղաքները պ. պ. Հ. Առաքելեանի և Ա. Արասխանեանի հետ մեր սովատանջ և հայ-թուրքական ընդհարումների պատճառով աղքատացած ժողովրդի համար ժողովարարութիւն անելու: Իւր այս առաքելութիւնը կատարելուց յետոյ՝ անցել էր Քիչնիկ՝ Սինոդի յանձնարարութեամբ այնտեղի Կոնսիստորիայի գործերը քննելու և Էջմիածնապատկան կալուածների վիճակը ուսումնասիրելու մասնագէտների խորհրդակցութեամբ: Իսկ Գարեգին վարդապետը մեծ պասի ընթացքում քարոզում էր Տփլիսի վանքի մայր եկեղեցում:

Տ. Մատթէոս վարդապետ ընտրուած և հաստատուած է Ալեքսանդրապոլի փոխանորդ: Բարձրապատիւ Հայրը Զատիկի տօներինց յետոյ գնաց իւր պաշտօնատեղին:

Զատիկի տօնի առթիւ Մայր Աթոռի միաբանութիւնը ներկայացաւ Ն. Սրբութեան և շնորհաւորեց յարութեան տօնը: Երևանից նոյն նպատակով Մայր Աթոռ էր եկել Գերապատիւ Տ. Յուսիկ Արքեպիսկոպոս Հոգաբարձութեան մի քանի անդամներէ հետ:

Զատիկի արձակուրդներին Մայր Աթոռ էին եկել մի խումբ հայ նկարիչներ՝ պ. պ. Թեոքիմէզեան, Եղիշէ Թադէոսեան և Շարբաբեան, հնասէր և լուսանկարիչ պ. Լեբինսկու հետ, հնութիւններ և մանրանկարներ ընդօրինակելու և լուսանկարելու համար:

Ապրիլի 27-ին Վեհափառ Հայրապետը ճանապարհ ընկաւ դէպի Տփլիս: Ամբողջ միաբանութիւնը Վեհարանում Ն. Սրբութեան աջը համբուրելուց և բարի ճանապարհ մաղթելուց յետոյ՝ ուղեկցեց նորան պարիսպներից դուրս՝ մինչև կառք նստելը: Հաւաքուած էր ժողովրդի բաւական բազմութիւն: Ն. Սրբութեան ուղեկցում էին Տ. Տ. Ղևոնդ եպիսկոպոս և Մեսրոպ, Մխիթար, Ներսէս և Մեսրոպ Մաղսուդեան վարդապետները: Նորին Սրբութիւնը ժամանել է Տփլիս, նոյն ամսի 28-ին, իսկ 30-ին այցելութեան է գնացել Տ. Փոխարքային: Ն. Պայծառափայլութիւնը մի ժամից յետոյ իւր ընտանիքի և գեներալ գուբերնատորի հետ փոխայցելութեան է եկել Ս. Հայրապետին:

Այս տարի Ճեմարանի մասնագիտական բաժինն աւարտեցին 17 հոգի. գոցանից չորսը Բ. լսարանցիք էին, որոնք իրաւունք էին ստացել Գ. լսարանցիների հետ վերջնական քննութիւն բռնել: Նորաւարտները Ապրիլի 29-ին հոգեհանգիստ կատարել տուին Ճեմարանի հիմնադիր Գէորգ Դ. կաթողիկոսի գերեզմանի վերայ, և նոցանից մէկը՝ Քէպապճեան Գրիգոր՝ երախտագիտական մի ճառ կարդաց: